

【避暑】葉美伶原作

鳳凰樹榮榮，細細蕊个靚花開到鬧熱煎煎仔，日頭緊來緊烈，企在樹下看往上，日頭絲仔晟到人睷目毋開，不時還聽得著樹頂蟬仔，知了<sup>1</sup>～知了～知了～，放勢牯唱等這時節正會有个歌曲。

逐年這央時係佢最暢个時節！等學期結束、放寮該下，阿爸會送佢轉莊下同講客个阿公、阿婆培養感情。歇在莊下無冷氣，毋過，闊闊个瓦屋當涼，若係暗晡頭還會熱个時節，阿婆就會擎一支扇仔摺佢撥涼，撥啊撥欸毋多知仔佢就牽覺咧。老屋面前有一隻盡闊个禾埕，阿婆講這位頭擺係晒穀用个，今這下穀都直接載去農會焙咗，毋使日頭晒，也毋驚下晝頭个風馳雨。阿婆講著頭擺艱苦个日仔，成時還會偷偷仔捫目汁。這下禾埕既經變成停車坪咗，毋過下把仔<sup>2</sup>還係晒蘿蔔乾、晒鹹菜乾个好所在，乜係佢兜細人仔个遊樂場。

阿公个屋面前有一頭蓮霧樹總係打到結結，一樹仔个蓮霧纜纜吊吊。逐年到這時節就像係同佢講：「歡迎光臨，佢煞猛打子等你来，就像阿公、阿婆心肝肚園等淦淦个愛，望等子孫轉來共

樣哦！」屋頭前還有一條圳溝，歸日仔泉水流流流流，到這下都還有蝦公好捉。阿婆講，就算係天旱乜毋怕，泉水分佢个恩情佢愛知好惜。在烈烈个日頭下，最清涼个享受就係去洒水仔、覓蜆仔、捉蝦公，還過去戽水、捉魚仔。禾割忒，在田坵肚煨番薯、搞騎馬打戰、搞扮家啦仔，這兜全部都分佢兜細人仔搞到歡喜靈天，也就係佢避暑个快樂生活。

一瞞目，佢讀小學三年生咗，阿姆安排佢在避暑去補習。逐日關在冷氣間肚，完個人<sup>3</sup>就像擲絛个弓，害吾身材變到又高又瘦，人也變到又還較白淨。佢歸日仔像極樂仔樣仔挨無停，佢想有阿公、阿婆个莊下哩！想等，該恁多蓮霧還等等佢去摘；想等，鄰舍个細人伴仔還等佢去共下搞園人尋……。

阿爸講，佢客家人盡重要个兩件事情：讀書摺耕種。人講「晴耕雨讀」，故所，愛出頭天，讀書第一重要。好得，阿爸不時還會擲工載佢兜轉去看阿公、阿婆。其實，佢盡捨毋得个係無法度逐日聽著阿公、阿婆講好聽个古，還過瓦屋禾埕坪、老老嫩嫩好聽个客家話。

<sup>1</sup> 知了：音 di' lio'；知道了。

<sup>2</sup> 下把仔：音 ha ba' e'；有時候。

<sup>3</sup> 完個人：音 von' ge ngin'；整個人。

## 編號 2 號

### 【鬧熱个落雨天】曾菁怡原作

鬧鐘仔鈴、鈴、鈴<sup>1</sup>響哩！大嫲聲喊佢遽遽跣床，再過忍床就會赴毋掣去學校讀書哩。佢目西西仔伸手去掀忒鬧鐘，又過橫落眠床，捨毋得摺佢分開。欸！毋係天光咁？外背仰會還係暗摸胥疏？探頭看往出，原來係天公派烏雲來通知佢兜——愛落雨哩！

有人認為落雨天係麻煩天，出外愛著水衣仔，無就擎遮仔，一無細義衫褲又會涿到濕溶溶仔，愛去哪仔都毋方便。學生仔盡惱無法度出去打球仔、搞寮，一下課就會分先生掌等，麼人都做毋得出去涿雨，故所見看啊著落雨，大家就唉唉唧唧，眼盯盯仔看等雨水號等歸隻个運動坪，實在還慍悴哦！

毋過，落雨天對佢來講顛倒係異鬧熱个日仔。朝晨頭一出門，滿街路都係淅淅个車仔，這片嘩嘩、該位叭叭，像久見个朋友相借問樣仔，大家相賽尖共下講起恁久無看著个思念。該兜行路个人，擎等一支支个遮仔花，分雨水淋啊過，跔等就開出各色个花彩，捩去捩轉像在該比看麼人个花較靚樣仔。你係同佢聽較真兜仔，該雨水打在車仔頂、屋頂、水窟仔還過樹葉仔頂高个聲，全部都無共樣，有高音、有低音，有大聲、有細聲，像係在

該唱歌仔分你聽樣仔。成時，雷公還會用躡燼來打燈光，用響雷公來和聲，恁樣講起來，係毋係異生趣？

佢盡好在落雨天打早就去學校，因為該兜平常時固核核个蠅螺仔<sup>2</sup>、蟻公全部都會趟出來搞水。學校个圖牆<sup>3</sup>係紅毛泥作个，壁項生个溜苔青里里仔，落雨該下，蠅螺仔趟上趟下陣打陣，相賽看麼儕蹶較遽，有个彎來幹起做起畫圖个藝術家，有个停跔在圖牆頂高享受分雨涿个清涼、逍遙、還過自在。

落雨天出來搞寮个蟻公盡好膽，衫褲無著就緊拚拚仔走出來搞水，溝壩肚朗朗滾个水流緊冲等來佢也毋驚。有幾下尾蟻公分水冲啊去還會搖來擺去，暢到奈毋得。有个蟻公大擎擎仔趟到路項來，較砸身个還做得趟轉去；較嫚个將就橫在路徑頭，分天公做主哩！

鬧熱个落雨天，有人懊惱，有人歡喜，天公無法度合每一儕人个意，佢就愛自家改變想法，不管麼个天都係盡好个天。

<sup>1</sup> 鈴：音 liang；擬聲詞。模擬鈴聲。

<sup>2</sup> 蠅螺仔：音 se̍ lo̍ e̍；蝸牛。

<sup>3</sup> 圖牆：音 tu̍ xiong̍；圍牆。

【阿媽个鹹糜】黃旭霞原作

起屋个師傅還過做小工个叔姆在禾埕頂無閒泊杈。師傅交代叔姆愛膠磚仔淋濕來起屋時正好用，阿媽看叔姆無閒在該攪沙仔，走去牽水管仔來淋磚仔，佢就跔等阿媽在旁脣搞水。

阿爸在外地上班無法度輒輒轉屋下，屋下大細頂个事情全部係阿媽一儕人拔起來做到兩頭烏，佢俚毋知頭天个三姊妹，想著會有新屋好歇、有自家个間房好戴，心肝肚不時都固有歡喜个心情。成時阿媽喊來掙手搬磚仔、疊磚仔、攞水、攞茶……，佢膠兩個阿哥定著會去掙手！

下晝兩點空仔，阿媽在灶下無閒，耳公聽著阿媽拿菜刀切豬肉、香菇、芹菜，洗鑊頭、開瓦斯……，哇！阿媽愛開始煮點心哩！佢恬恬仔去灶下看阿媽煮點心。阿媽對豬油盞仔挖兜仔豬油放落鑊肚，續等放浸過个蝦米、香菇來敲香，炒出香味過後放切好个竹筍，炒一下仔，正放洗淨个米共下過炒，浸過蝦米同香菇个水乜無打爽，滴兜仔豆油後就同滾水共下倒落去煲糜哩！差毋多半點零鐘邊仔糜就煲好咗，毋過糜燒燒仔，阿媽就同歸鑊仔个糜沾<sup>1</sup>在大面盆裡肚，分糜莫恁燒。

「阿霞！掙手撿碗筷，放到禾埕个矮桌仔頂。」

聽著阿媽喊，佢遽遽排好碗筷，阿媽就喊佢三姊妹入去旁脣个矮屋肚搞。阿媽講：「師傅食點心，細人仔毋好坐在脣頭看人食，恁樣無禮貌。」行入矮屋肚佢就拿細凳頭仔來墊腳，對細窗門仔偷看師傅佢兜食點心，老師傅添第三碗，做小工个叔姆乜添第二碗，佢心肝肚當緊張，肚屎咕嚕咕嚕个聲也毋會輸人。阿媽煲到恁大鑊个鹹糜就會無咧！吾个嘴，毋知幾時嘎翹到半天高。

佢遽遽走去灶下，該央時阿媽去收該伸無兩碗个鹹糜咗，阿媽喊佢去掙手收碗筷，佢毋甘願，慢慢仔行、慢慢仔做，碗筷放在灶下就愛走咧！阿媽講：「去拿碗來裝。」原來，阿媽煲好鹹糜，早就有留兜仔分三個細人仔咗。

佢遽遽拿碗去裝糜，這下就顧毋得該下發關个面子咧！鼻公膠嘴愛開始無閒哩啲！

一碗好食个鹹糜，有香菇、蝦米、竹筍、靚豬肉、芹菜，還過阿媽惜子女个心。還細時節佢食毋多出來，這下佢自家做阿媽咧，特別感受得著這一碗鹹糜个好味緒！

<sup>1</sup> 沾：音 dem'；把物品微微浸泡於水面。